

ELEZIOGN/1

La jent da Col l à dezijo: Paolo Frena l sarà iaro Capocomun

Con debota l 80% dei voti la lista «Auna per Col», espression de la aministrazion da davant, la ogarà l pais incia per i zinch agn che ven

Deguna sorpresa, come che se se spetava: l capocomun da davant Paolo Frena l è stat riconfermà nte sua inciarìa incia per i zinch agn che ven. La lista zuita l à fat l suo dover e l à slontanà l pericol del commissariament, incia se l fato che l abe ciapà 42 voti, pi del 20%, vol di che l è valgugn che l candidato prinzipal no i comodava – incia se respet ai 76 de ja zinch agn l è n bel miliorament. Le preferenze i è jude n bona part ai consilier de l'aministrazion da davant: ntel nuof consilio de comun però jirà ite duc i candidat a consilier de la lista de Paolo Frena, auna al candidat capocomun de la lista zuita e ai suoi doi candidat con pi preferenze. «Sion contenc de ester stai riconfermai – l dis Frena – e scomenzon sta nuova esperienza con pi convinzion de davant, e de chest ringrazion

incia l'auta percentual de voti che aon ciapà. Se ciataron i di che ven per dezide a chi afidà i asesorac, e zerciaron de ciò ite ntel nost projet incia la mendranza e i consilier pi jovegn che ven ite per la prima ota, conforme suo temp e disponibilità che i darà. M'è fat piazer senti insera (lunes dadasera, ndr) l president Zaia che l dijeva che el no l pensa a la politica nazionale, ma a aministrà: mi crede tant nte la desferenza che pol fà n aministrazion che fà suo laor pulito l pais. Duc i voti che l à ciapà incia nta Col l è l segn dei resultac che se pol avè a le eleziogn co s'è aministrà pulito, e pense che noi nte sti agn n aone dat dimostrazion parceche no l è stat n di sol del nost mandato che no aone laurà per l Comun.»

Martino Pezzei



L nuof capocomun da Col Paolo Frena al voto.

RESULTAC ELEZIOGN DE COMUNA COL

JENT CIAMADA A VOTÀ	391
JENT CHE É JUDA A VOTÀ	218 (55,7%)
SCHEDE BIENICE	16
SCHEDE NULE	5



LISTA E CANDIDAT CAPOCOMUN	VOTI	PERCENTUAL	SEGI N CONSIGLIO COMUNAL
Auna per Col – Paolo Frena (capocomun)	155	78,6%	7
Lista Civetta – Sisto Agostini	42	21,3%	3

VOTI PER I CANDIDAT A CONSILIER

CANDIDAT	LISTA	VOTI
Agostini Carlo	Lista «Auna per Col»	24
Chizzali Lorenzo	Lista «Auna per Col»	19
Sief Lucia	Lista «Auna per Col»	12
Troi Mattia	Lista «Auna per Col»	9
Tasser Marco	Lista «Auna per Col»	5
Lezuo Veronica	Lista «Auna per Col»	4
Troi Maurizio	Lista «Auna per Col»	3
Pezzei Alfonso	Lista «Civetta»	5
Paola Beniamina Agostini	Lista «Civetta»	3
De Biasio Francesca	Lista «Civetta»	3
Cogo Luca	Lista «Civetta»	1
Savasta Jacopo	Lista «Civetta»	1

ELEZIOGN/2

Luca Zaia l stravinz le eleziogn regionai n Veneto

Doi mandac no l è stat assai per l president che ven da la trevijana, che no l à lassé larch a chi auter candidat che i à ciapà domà le fregole

Se l save bele davan de jì a votà che l eva sigur che a vinze le eleziogn per governà l Veneto sarave stat Luca Zaia, bele president per doi mandac: e sta previjion la è stada confermada, con debota l 77% de chi che è jui a votà che i à dat sua preferenza, la percentual pi auta da canche l è le eleziogn per le Regiogn. No l è tant na vitoria per la Lega o per la derta, ma personale: la lista Zaia l à ciapà l 46%, contra domà l 16% de la lista de la Lega. N segnal chest che n Veneto no s'è votà tant per l partito ma per la persona, e del resto la Lega targada Zaia, che la descor de autonomia e l è la os pitost moderada de una de le regiogn motor de l'Italia, no l à tant a ce vede co la Lega nazionale, oramai senza na conotazion «padana», nazionalista e contra i imigrai, e che la punta a tirà su i voti de duc i inrabie e estremisc che la pol ciatà.

Zerto a favor de Zaia à pejà incia la gestion de l'emergenza del Covid-19: la batalia de sti mesc contra sta strazaria la è diventada na campagna eletoral continua, co le direte Facebook de la Protezion Civile fate ogni di che i à impermetù de se fa cugnesc incia ai zitadign pi dalonz da la politica, e i boggn resultac de la gestion sanitaria de la pandemia n Veneto, confrontai con chi de la Lombardia apede ju, i à fat l rest. Per le zone colpide da Vaia ntel 2018, la prejenza fissa del assessor regional a la Protezion Civile Bottacin e i schei imprometui e mitui da la Region per fà i laor, i à fat l medemo efeto. Nte la situazion che sion no l è stat possibile fà na vera e propria campagna eletoral per chi auter candidat, tanto che manco de n veneto su zinch l avesse sapù da di l inom de almanco un.

A Souramont no l è stat desferenze respet a chel che l è suzedù a livel

general, col comun da Col che anzi l segna l record nte la provincia per le liste liade a Zaia, col 90,82% dei voti, e i comugn de Anpezo col 88,2% e de Fodom col 84,4%. Le liste liade a Lorenzoni, candidat per i partiti a man zanca, no le ruà degò al 10% e l candidat del Moviment 5Stele Enrico Cappelletti gnanca al 2%, a conferma del strapoter de Zaia e incia dei scars resultac sul teritorio dei 5Stele.

N Consilio regional maoranza assoluta per i partiti liei a Zaia, con 41 segi a 9: ades sarà da vede se nte zinch agn che vignarà sua coalizion la darà dimostrazion de s'avè merità la fiduzia de la stragrand part de la popolazion, e anter Zoghi olimpici e ricostruzion darè Vaia nuos pais i podarà ben vede ce intenziogn che i à a Venezia.

Martino Pezzei

RESULTAC ELEZIOGN REGIONAI A SOURAMONT

	ANPEZO	FODOM	COL
JENT CIAMADA A VOTÀ	5.070	1.143	391
JENT CHE É JUDA A VOTÀ	2.803 (55,3%)	548 (47,9%)	220 (56,3%)
SCHEDE BIENICE	26	15	7
SCHEDE NULE	43	14	6

CANDIDAT PRESIDENT	LISTA	ANPEZO	FODOM	COL
Luca Zaia - 3036 voti	Zaia Presidente	1287	267	130
	Lega Salvini	281	57	25
	Fratelli d'Italia	400	39	10
	Forza Italia - Autonomia	63	6	2
	Lista Veneta Autonomia	20	2	2
Arturo Lorenzoni - 258 voti	Partito Democratico	115	27	9
	Europa Verde	27	6	4
	Il Veneto che Vogliamo	8	2	1
	+Veneto in Europa - Volt	8	4	0
Enrico Cappelletti - 52 voti	Sanca Autonomia	0	0	0
	Movimento 5 Stelle	30	5	1
Simonetta Rubinato - 33 voti	Veneto per le Autonomie	18	7	2
Patrizia Bertelle - 30 voti	Veneto Ecologia Solidarietà	21	3	0
Antonio Guadagnini - 21 voti	Partito dei Veneti	13	8	0
Paolo Benvegnù - 16 voti	Solidarietà Ambiente Lavoro	4	2	1
Daniela Sbröllini - 13 voti	Italia Viva - Civica Per Il Veneto - Pri - Psi	5	3	0

NATURA

«Semenon le plànte da ourt cuaji desmentiade e che n viade se douráva per la speisa»

La vijita de l'Università de Viena nta Fodom



La delegazion del Osttirol a Masarei de Fodom.

L è parti l Projet Interreg Italia-Austria per cialé de ciapè fora le vegle sort de plànte da ourt: tol pert i Comuns de San Tomesc, La Rocia, Valada e Fodom, auna col Comun de Assling ntel Osttirol. La domànda l'è stada prejentada, a suo temp, al GAL Alto Bellunese, sot la direzion de Flaminio Da Deppo; l'è po stada

aproada da l'autoritè de gestion de la Provinzia Autonoma de Bolsán ntel 2018. L projet l à l obietif de jì a cheri e ciapè fora chèle vegle sort de plànte che vigniva dourade per la speisa tanc de agn fesc. Nta Fodom – ence grazie a l'Aministrazion Comunale, che à dé ite na pert del cofinanziamet – à tout pert al projet

cinch agricoltori custodi, che fossa persone nciariade de cheri fora vegle semenze da mète jù nte ourt e da podei dourè per fè da mangè.

Per Fodom l è sté cièrnù fora: la fava, l pavè, i res da capuc, l liron, i cèji e na vegla sort de scianscioni, clamei scianscioni neigri. N valgone de chèste le crèsc ncora nte i ourc

da Fodom, ma le no ven dourade dai nosc ristoranti per i piac de la tradizion da prejenté a la jent. Na menzion la vò fata souradut al liron (camelina sativa sp.) che, co le ultime semenze salvade, l è sté metù ju via Salejei e nta Fossel, ulache l à buté polito; coscita l'è sté salvé na plànte che l'è na mascia de benefizi per la sanità. Difati, la Prof. Ursula Schwab de l'University of Eastern Finland, che l'è studiè ci che l è nte la semenza, l'è dit che se ciapa ite n grum de acidi grassi insaturi, boggn per le analiji del sànc. Nzacan ste semenze, davò ester stade brostolade e schiciade, le vigniva dourade da mangè coi sansoni o ence da mète soursa jù su altre speise.

L è da di velch ence sui res da capuc: na sort che noster mède le mèt ju ncora via Ornela, n'Andrac e sun Chierz e che la nterescia trop, percieche nviade la vigniva dourada come speisa: i vigniva dourei per fè l pastolè dei cajunciei, che i fajèva tres na bona paruda su le taule fodome.

Dute chèste sort, chersciude n stouta nte i ourc de la Sandra e de

la Ester de Masarei e de la Maria Rosa del Mâne, i è stade considerade da la delegazion del Osttirol ai pruns de setember. L Prof. Christian Vogl de l'Università de Viena e la Dot. Brigitte Vogl – esperta de formazion per la coltivazion de le plànte che i è drio a mori fora – i è stei menei a analisè i ourc de ste èle che à mantignù e recuperé chèste sort de plànte. La delegazion austriaca l'è tant rengraziè per la vijita e manifesté la contentèza per podei tò pert a sto projet. Ence lori i volèssa nviè chi da Fodom a na vijita che l'assa da ester fata l ann che ven nte la Lesachtal – damprò Maria Luggau – per vedei le sort de plànte cuaji desmentiade che ven chersciude ntel Osttirol e nte la Carinzia. Na seconda vijita, per chi che à tout pert al projet, l'assa da ester a Mohndorf – l paisc del pavè – nte la bassa Austria: nte sto cajo, fossa da sté fora doi not, per vijitè i ciamp de pavè che nte sto paisc i passa via i 300 etari.

Bepo Gobo